



Rabu, 07 Agustus 2024

Ogen: Sakaria 7:1-7



Puasa Si Pekulah-Kulah



W *O bapa Tetro, enggo mbelin anakta ah, enggo me banci cidahken dirindu bas gereja, mela kita kari, erjabu aku nina Tetro tapi kam la pernah idah kalak menggep bas dahin-dahin gereja e'* Nina nande Tetro man bapa Tetro. Ngukur-ngukuri ranan nande Tetro ndai bage me berkat bapa Tetro ku gereja, tande warina, bulan ras tahunna, tapi lalap Tetro ndai langa erjabu. *"Langa kin bias aku ku gereja e nande Tetro, kai nindu e me ku lakoken, tapi anakndu ndai lalap langa erjabu, mbiar nari nge kam kena cakap kalak si nterem, bage pe ku tahanken, tapi lalap langa lit ulihna"* nina bapa Tetro, tupung ngadi bas sapa juma. Adi bapa Tetro terpaksa ku gereja erkiteken lit sura-surana, bage ka nge jadi i bas bangsa Israel. Nai lit kejadi runtuh Rumah Pertoton (2 Raja-raja 25:8-9), e maka ersada me arih bangsa enda erpuasa segelah banci Rumah Pertoton e mulihken pajek (terbangun). Erdandanken si e, erpuasa enda enggo jadi sada kebiasaan geluh. Piga puluh tahun kenca si e, tersungkun me kalak enda arah pertotonna, maka perlu denga kin erpuasa adi enggo pajek Rumah Pertoton e? Arah penungkunen enda teridah isi pusuh singatakenca maka sedekah enda ia erpuasa erkiteken lit sura-surana (terpaksa), labo arah ukur ersuruh guna enghamati Dibata. Banci si bayangken uga latihna ndahiken sada dahin adi terpaksa. Dahin si kitik e pe jadi mberat. Bage me silakoken bangsa enda, seh maka ikataken puasa sinilakokennna e me puasa si pekulah-kulah. Moria kekelengen ni Tuhan, tek kita Dibata meteh seh ku bas pusuh, erkai maka lit entah banci pe mbelin denga biak pekulah-kulah? Bersihkanlah dirinta bas si e nari maka dahikenlah pelayanen e arah ukur ersuruh, tentuna i je lit keriahen dengen kemalenen ate.